

## Chianciunu st'ucchiuzzi beddi

(canto dedicato alla Madonna delle Lacrime di Siracusa)

Madunnuzza picchè chianci,  
chi voi diri cu' sti lacrimi?  
A nuàutri piccaturi,  
figghi 'ngrati e senza amuri;

di ss'ucchiuzzi accussì beddi,  
ancora scinnunu 'sti lacrimi;  
di 'na Matri addulurata,  
pi li figghi senza strata.

*Sunu lacrimi d'amuri, sunu lacrimi 'i duluri;  
sunu lacrimi chi vannu, ritti 'o cori senza 'ngannu.*

Biniritta Matri Santa,  
li to' figghi su' spartuti;  
sciarriati sunnu a morti,  
fannu guerri e tanti torti.

E lu figghiu Gesù Cristu,  
ogni ghiornu è crucifissu;  
cu' li chiova di lu mali  
e cu' spini 'nta la testa.

E scippamuli sti chiova,  
e tiramuli sti spini;  
e scinnemulu da cruci  
a Gesuzzu cu' li schini.

E arriposati ss'ucchiuzzi,  
Madunnuzza cu' sti canti;  
'n cielu acchiana cu' to' figghiu,  
l'angiluzzi e tutti i Santi.